

Kontuola

ANTZUOLA / Egubakoitza / 2003ko apirilaren 11 / 154. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Igerilekuak egiteko hainbat oztopo dituzte

AINZANE IRIZAR

Duela hiru urteko aurrekontuetan igerilekuen proiekturako partida bat aurrez ikusi zuen Udalak. Orain, proiektua aurrera zihoala zirudienean, Gipuzkoako Diputazioak Udalari esan dio ezin daitekeela igerilekurik egin Sagasti auzoan.

Herriko gazteek eta gurasoek, batez ere, aspalditik eskatu izan diote Udalari herrian igerilekuak egitea. Oraingo legealdian, azkenean, gaia aztertzen hasi zen Udala. Proiektua egiten hasi aurretik, Antzuolaren tankerako hainbat herrirekin harremanetan jarri ziren Udaleko arduradunak, zelako igerilekuak zituzten ikusteko. Igerilekuak egiteko asmoa bideragarria zen ere ikusi nahi zuten Udaleko arduradunek beste herri batzuetako arduradunekin hitz eginda. Batekin eta bestearekin egon eta gaia ondo aztertu ondoren, hainbat irizpide zehaztu zituen Udalak.

ZMZ enpresari esleitu zizkionten aurre proiektua egiteko lanak. Gauzak horrela, bazirudien aurrera zihoala orain arte asmo hutsa zen proiektua. Baina, aurreko astean bertan, Diputazioaren jakinarazpen bat jaso zuen Udalak, Sagasti auzoan igerilekurik ezin dela egin esanaz. Badirudi arrazoiak dela inguru horretako lurzorua ez dela egonkorra; Udala, baina, ez dago konforme Diputazioaren jarrerarekin.



Udalaren asmoa da igerilekuak Sagasti auzoko zelaian egitea.

LURRA MUGITZEKO ARRISKUA

Udalaren asmoa da igerilekuak Sagasti auzoan egitea, eraiki berri dituzten etxebizitzaren aldameneko zelaian. Gune hori errepidearen ondoan dagoenez, Diputazioak Errepide Sailari baimena eskatu zion Udalak. Kasu horietan, Diputazioak zehazten du errepidetik zenbat distantziara egin behar diren lanok. Gune horretan, gainera, lurra mugitzeko arriskua duenez, Udalak espero zuen hainbat neurri tekniko har-

tzeko aginduko ziola Diputazioak. Baina ez bata eta ez bestea. Harrituta geratu dira Udaleko arduradunak jasotako erantzunarekin. Izan ere, Diputazioak Udalari esan dion gauza bakarria izan da hor ez dagoela igerilekurik egiterik. Arau subsidiarioetan ere jaso zuten gune horretan igerilekuak egitea eta Diputazioak ez zuen orduan alegaziorik aurkeztu. Alkateak adierazi digu proiektu hori aurrera eramateko lanean jarraituko dutela.

KIROLA

Finalerako sailkatu dira gimnastak

AINZANE IRIZAR

Aurreko asteburuan Gipuzkoako eskolarteko txapelketako finalurrekoak jokatu zituzten herriko gimnastek Azkoitian. Alebinak lehenengo postuan sailkatu ziren taldeka; Ikerne Rodríguezek eta Maialen Legorburuk, berriz, bergararren parte hartu zuten.

Denboraldi ona egiten dihardute gimnasia erritmikoko herriko neskek. Aurreko zapatuan ere, apirilaren 5ean, ondo ibili ziren antzuolarrak Azkoitian jokatu- tuko eskolarteko txapelketako finalurrekoetan.

Alebin mailako boskoteak pilotarekin egin zuen saioa, taldeka. Lehenengo postuan sailkatu ziren eta, horrela, finalerako txartela lortu dute.

Benjaminei dagokionez, Ikerne Rodríguez antzuolarrak hartu zuen parte txapelketan. Bergarako taldearekin jarduten du Ikernek, bere adineko gimnasta bakarria delako herrian. Bergarako taldea ere lehenengo postuan sailkatu zen Azkoitiko finalurrekoan. Beraz, benjamin mailan ere izango dugu Antzuolako ordezkari bat finalean.

Kadete mailan, Maialen Legorburuk lan bikaina egin zuen txapelketan. Bakarkako lanean bigarren postuan sailkatu zen, eta finalerako txartela lortu zuen. Taldeka, berriz, Ikernek bezala, Bergarako taldearekin jarduten du Maialenek, eta lehenengo postuan geratu ziren. Hortaz, taldeka ere jokatu du finala Maialenek. Dena dela, oraindik zehazteke dago non eta noiz jokatuko dituzten finalak.

LABUR

Egunkariaren aldeko bonoak salgai jarri dituzte eta udaletxean eros daitezke

Euskaldunon Egunkariaren alde sortutako herri batzordeak ekimen berria jarri du martxan; *Egunkaria* diruz laguntzeko bonoak salgai jarri dituzte, 50 euroren truke, udaletxean. Bestalde, *Egunkari* eraren harpidetun egiteko kanpaina ere aurrera doa. Dagoeneko 31 antzuolar harpidetu dira. Harpidetun egin nahi izanez gero, euskara zerbitzuan jaso ahal izango duzue informazio gehiago.

Kike Amonarriz soziologoak hitzaldia egingo du gaur, egubakoitza, udaletxean

Korrika Kulturalaren barruan, Kike Amonarriz hitzaldia antolatuko du Antzuolan, *Eske hau superguay da* izenburupean. Gaur, egubakoitza, izango da hitzaldi hori, 19:00etan, udaletxeko osoko bilkuren aretoan. Gaur egun gazteek darabilten hizkeraren gainean jardungo du Amonarrizek.

Immersok antolatutako oporraldietarako izena emateko aukera apirilaren 25era arte

Urtero moduan, hirugarren adinekoendako hainbat aukera eskaintzen ditu Immersok: Penintsula barruan, Balearretan, Kanarrietan eta Portugalen. Kultur bidaiak eta naturarekin lotutako turismoa egiteko aukera eskaintzen dute. Informazio gehiago nahi izanez gero eta izena emateko, apirilaren 25a baino lehen udaletxeko gizarantz zerbitzura jo dezakezue.



Jose Luis Zabalo

Birgaitzeak • Fatxadak
Teilatuak • Sukalde eta bainu gelak

Kalegoi 9, 1. solairua, ANTZUOLA Tel. 943 76 60 89

LEKY-BERRI
MERENDEROA

Janariak
eta
edariak

Tf. 943 76 60 94
ANTZUOLA

AGINTALDIARI BEGIRATUA

MIREIA UNAMUNO/ANTZUOLAKO ALKATEA

“Eztabaida politikoa alde batera laga eta udal kudeaketan oinarritu gara”

AINZANE IRIZAR

Antzuolak izan duen emakumezko lehendabiziko alkatea izan da Mireia, berak horri garrantzirik ematen ez dion arren. Esperientzia oso aberasgarria izan dela azaldu digu, eta orokorrean, agintaldiaren balorazio positiboa egin du.

Orokorrean, zela baloratuko zenuke legealdia?

Alde batetik, urte gogorrak izan dira, egoera politikoagatik. Baina, gure artean, zinegotzian artean, betidanik ohitura izan den moduan, ondo konpondu gara; izan ere, ez dugu politika egin, udal kudeaketan oinarritu gara. Eztabaida politiko hutsa alde batera laga eta udal kudeaketan zentratzea lortu dugu. Dena dela, psikologikoki eta pertsonalki asko eragiten dizu egoera politikoak; kontuan hartu behar da alderdia bertan behera laga zutela, orain legez kanpo laga dutela...

Legealdi hasieran aurrez ikusten zenituzten proiektuak eta asmoak zela joan dira?


Asmo batzuk aurrera joan dira, beste batzuen kasuan, berriz, zailtasun handiak izan ditugu. Gertatzen dena da askotan eskumenean inguruko borroka bat egotea dela, hau da, dena ez dago Udalaren esku. Dena dela, orokorrean, nahiko ondo joan direla uste dut, sortu dizkiguten angustia eta arazo guztiek.

Lau urte hauetan egin dituzten zein gauza azpimarratuko zenituzke?

Horrelakoetan, lan handiak aipatzen dira, eta noski, badaukate euren garrantzia. Baina, badaude beste gauza txikiago batzuk, horrenbeste ikusten ez direnak, nire ustez, behintzat, garrantzia handia dutenak. Eta hor, igogailuen kanpaina aipatu nahi nuke. Ikusten genuen herriko auzo batzuk, 1970. hamarkadako boom urbanistikoan eraikitakoak, husten zihozazela; izan ere, nagusitzen doan jende asko bizi da auzo horietan, eta irisgarritasun arazo gero eta handiagoak zituzten. Horren aurrean, kanpaina bat jarri genuen abian, igogailuak jartzen zituztenei diru laguntzak emateko. Oso emaitza onak lortu ditugu.

Zintzilik edo bukatzeke, berriz, zer geratu zaizue?

Igerilekuen proiektua, esaterako, hor daukagu; lehen esan dudana bezala, kasu horretan ere, eskumen borroka bat dago. Asko hitz egiten da udalen autonomiaz, baina, benetan, ez dago horrelakorik; beno, egon badago, baina muga askorekin. Zintzilik geratu zaizkigunak kudeatzen jarraitzen dugu, zailtasunekin, gure



“Igogailuen kanpaina azpimarratu nahi nuke; oso emaitza onak lortu ditugu”

gainetik beste erakunde batzuk daudelako, zeresana daukatenak.

Elkarlanean oinarritzen zaretela azaldu diguzu; dena dela, EAJk laga egin zuen Gobernu Batzordea.

Bai; nik esango nuke, momentu hartan, estrategia politiko bat izan zela. Egoera politiko orokorra horrela zegoen, eta joko politikoa izan zela uste dut. Baina, gero, gure eguneroko errealitatea ez da hori izan; nahiz eta Gobernu Batzordeko kide legala ez izan, elkarlanean funtzionatu dugu, erabakiak denon artean hartuz.

Nik uste dut, eta guztiz konbentziturata nago, gainera, horrelako herri txikietan, politikoki gure artean egon daitezkeen ezberdintasunak oso txikiak direla; kudeaketa mailan, denok daukagu detektatuta herriaren beharrik zeintzuk diren. Horregatik, horretan ez dugu gerra handirik izaten.

Udaletan, politika egiteko edo politikara *jolasteko* badago foro

“Asko hitz egiten da Udalen autonomiaz, baina muga ugari ditu autonomia horrek”

bat, osoko bilkura; baina, nik defendatzen dudana da udaletxe barruko batzarretan egin behar dela lana eta politika alde batera laga. Bestela, eztabaida politikoa jausten gara eta kudeaketa lan guztia hutsaldu egiten da.

Berriro izango zinateke alkate?

Gauden egoera politikoa hori planteatzea zaila da. Dena dela, esperientzia pertsonal aberasgarria izan da niretako. Alde txarragoak ere badauzka: herri txikietan harremanak oso gertukoak dira, pertsonalak, eta horrek, askotan, desgaste handia suposatzen du. Gainera, bizi izan dugun egoeran horrelako kargu bat edukitzea apustu pertsonal bat da; psikologikoki, azkeneko urtea oso gogorra izan da.

Zer esango zenioke hurrengo alkate izango denari?

Pazientzia handia behar dela; bidean oztopo asko topatu arren, pazientziaz eta elkarlanean, denak gainditzen direla.

Beste udal taldeen iritzia

JOSE ANJEL ZABALO / EAJ

“Oposizio gogorrik ez egitea erabaki genuen hasieratik”

Iusio handiarekin hasi genuen legealdia, eskuarte proiektu ugari genituela: Olan etxearena, Gizarte Etxearena, Udalak lagundutako etxebizitzena... Gainera, hasieratik erabaki genuen elkarrekin lan egingo genuela, ez genuela oposizio gogorrik egingo. Dena dela, proiektu batzuekin arazoak izan ditugu, Olan inguruko urbanizazioarekin, esaterako: kudeaketa arazoak izan genituen, eta eztabaida batzuk izan genituen Udalean.

Aipatzekoa da, bestalde, industrialdearen proiektua; arazoak arazo, aurrera jarrai-



tzen dugu lanean. Bestetik, gizarte kontuetan ere apustua egin dugun arren, zera esan nahiko nuke: gainerako erakundeetatik laguntza behar duela Udalak.

JOSE IGNACIO MADARIAGA / EA

“Etxebizitzaren politika bereziki bultzatu dugu Udalean”

Oso esperientzia ona izan da legealdia, elkarlanean oinarritutakoa eta liskar handirik gabea.

Batetik, etxebizitzaren politikari garrantzia handia eman diogu, nahiz eta ekimen publiko nahi genuen adina etxebizitza ezin izan dugun egin.

Bestetik, errekarren auziari behin behineko irtenbidea eman zaio, nahiz eta gu ez gauden guztiz konforme. Dena dela, argi laga nahi nuke, zerbait lortu baldin bada, Deskarga Erreka Elkarteari esker izan dela.

Bestalde, ez nuke aipatu barik laga nahi aurrekontuekin



izan dugun arazoa. Gure ustez, ezin da herritarren diruarekin horrela ibili; gertatutakoa Udalaren ardura izan zen, eta, beraz, nire ardura parte onartzen dut.

JUAN BENÍTEZ / PSE-EE

“Elkartasuna eta elkar bizitza hartu behar ditugu oinarri”

Azkeneko urteotan asko eraiki da herrian. Lehen kale bakarra zegoen herrian; orain, berriz, kale berri bat estreinatu dugu, etxebizitza ugari eraiki dira..., eta ondo eraiki da, gainera. Hori positiboa da herriarendako.

Baina, eraikin garrantzitsuena, hau da, elkarbizitzarena eta giza baloreena, goitik behera etortzen zaigun egunean, material tona mordoan izango dugu, eta material hori ez da, gainera, birziklagarria izango.

Nire ustez, alde horretatik, gaizki eraikitzen dihardugu herrian; harkaitzaren gainean



eraiki behar dugu, oinarri unibertsalen gainean, denondako balio duten oinarrien gainean: elkartasuna eta elkar bizitza oinarri hartuta, eta ez oinarri nazionalistengan.